

QUÆSTIO MEDICA.

*Quodlibetariis disputationibus manè discutienda in Scholis Medicorum
die Jovis undecimâ Januarii 1714.*

M. JOANNE GELLY,
Doctore Medico, Præside.

An in morbis infrâ diaphragma præstat saphenæ sectio?

I.

HOMO ex humo, totus à naturâ morbus, cujus finis ab ortu pendet, & ab utero tumulus. Ætas quidem succedit ætati, sed cunctis labitur temporibus; velis, nolis, ut in vitam, sic in mortem per vices itur laboriosas. Morborum, quorum corpus humanum est ludibrium, ingens numerus; partium ex quibus conflatur, indefinens alteratio; caloris humidum absorbentis continua decessio; humorum & excretorum necessariò putrescentium quotidiana colluvies, fatalem accersunt moriendi necessitatem: remediorum ad levationem tendentium seges quidem multa, sed spes sæpè vana, & tot renascentibus hydræ capitibus elidendis Hercules pauci. Omni igitur ætate omnes homines in morbos incidunt, quorum tot sunt genera diversa, quot sunt modi quibus defleunt ab elatere solida, liquida à motu: undè inter affectus adeò discrepantes, alii celeritèr & cum vehementiâ sua percurrunt tempora; alii quàm diutissimè perstant; plures lethiferis sæviunt symptomatis; quidam suæ malignitatis velut conscii tanquàm angues latent in herbâ, vires, virus, exerturi; multi phreneticis concussionibus suas agunt sine lege tragedias; non pauci cum syderato videntur obdormiscere, qui clâm jacentem trahunt ad interitum. Artis est Apollinæ periti morbum à morbo, partem à parte, remedium à remedio distinguere; urgentibus occurrere indicationibus, ex quibus agendi lex capranda, occasione semel inventâ, quæ cita est, ocyùs uti; assidentia symptomata ægrum ante tempus præfocatura præstanti remedio, si fieri potest, avertere, ut vita quæ brevis est & anxia, tam angustis & incertis non definiatur terminis.

II.

UT neminem fata transmittunt, sic nulli parcit ætati morbus; neque suis duntaxat obnoxius vivit uteri latebris exclusus, sed nonnumquàm alienis, & ex parentum sæpè delictis pœnas immeritus

luit. Sic princeps animal in vitam tanquam in palæstram ingreditur, periculofam aggreditur navigationem, & eò magis periclitatur, quò major est solida inter ac fluida, humani corporis compagem componentia, diffensio: solida irrorantur fluidis, fluida reguntur solidis: in solidis desideratur habilis textura, motus in fluidis reciprocus: à dissoluto hocce jugi consortio parantur insidiæ multæ: in sanguine observanda est rapiditas, pigrities, ex quibus cæteræ labes; prior particulas ejus suprâ modum evectas & actuosas arguit, posterior otiosas & involutas: illinc exuperat, tumultuatur, effervescit; hinc concrefcit, stagnat, vapescit; ex unâ parte concitatur orgasmus, ex alterâ putredo; sic fit tristis morborum propagatio. Solidis sua pariter insunt errata; leviora, graviora, pro majori vel minori fibrarum extensione, contractione; ex hoc duplici fonte, sanguinis motu, vasorum nisu disparato, profluit morbus penè omnis: utrique medetur id genus auxilii, quod utriusque causam antevertit, impedimenta removet.

III.

DIAPHRAGMA, liberæ respirationis instrumentum, Hippocrati flabellum ventris, propter diurnam ejus nocturnamve in inspiratione depressionem, in expiratione supernè revulsionem, musculus est; suâ specie peculiaris, interjecti cujusdam parietis instar abdomen à thorace discriminans; nec ipse meliori luto sictus, nec levioribus quàm sibi subjectæ partes, ærumnis addictus. Infimæ regionis hujus incolæ, ventriculus, Pancreas, Hepar, Lien, Mesenterium, Intestina, Renes, Vesica, Uterus, & alia nutritionis ac generationis instrumenta. Sed heu quàm multi eorum penates per fas & nefas subeunt insensissimi cum suis satellitibus hospites, nausea, vomitio, dolor, inflammatio, erosio, sitis, ructus, rugitus, inflatio, singultus, cholera, pica, malacia, canina fames, apepsia, bradyepsia, dyspepsia, cardialgia, cachexia, atrophia, scirrhus, hydrops, coli cruciatus, melancholica hypocondriaca cæliaca affectio, ileus, dysenteria, diarrhæa, lenteria, tenesmus, lumbrici, ascharides, ulcus, abscessus, phlegmone, hæmorrhoids, fissura, condyloma, fistula, ani prolapsus, nephritis, calculus, gonorrhœa, diabetes, ischuria, dysuria, stranguria, mistio purulenta eruenta, hernia, mola, carcinoma, mensium stillicidium, profluvium, suppressio, fluor albus, foror uterinus, strangulatus, convulsio, sterilitas, abortus, hysterica passio, pariendi difficultas, extinctio fœtus in utero, &c. infelix hospitium, quod est veluti sentina corporis, & cujus janua tot prædonibus patet. Verùm opifex & opifer Medicus, sapiens Hippocratis imitator, partem affectam investigat accuratiùs, & ad eam confugit opem quâ vicino malo sæpiùs succurrerit; nullâ interpositâ morâ viciniorem referat canalem, ne, vel mali mutatione in pejus, vel novæ cla-

dis accessione, periculum augeatur³; Saphenam aperit, ut insidiosæ gentis molitur expulsionem, & hæc atria obsessione liberet.

I V.

SAPHENA vena est in pede suprâ malleolum internum, cujus continuatio in tarso; est ipsa venæ cruralis propago, sicut ischiadica, quæ reperitur in malleolo externo; sed hæc propter arteriæ, nervi, & tendonum viciniam, rarò nunc secatur, quemadmodum & poplitea, cujus tamen sectio veteribus erat familiaris. Qui morborum infrâ diaphragma ritè curationem instituere aggreditur, is si ad malleolum excurrentem aperit venam, viam detegit ad metam; qui tardius admittit, omittit, operam ludit, lædit, fallitur, fallit. Non tam intèrest quæ sit ætas, quis sexus, quæ regio, vel anni tempus; quàm quæ vires, quis morbus, quis morbi status, quæ statio! si in vasis abdominis delitescit sanguinis; sive copiâ, sive fermento, sive utroque turgescens, pravitas; si inclusa putredo morbum facit, saphenæ sectio alexiterium est ad manum præsentissimum, de melioribus optimum, de lectis probatissimum, nullâ ratione infensum, nulli hominum generi nocivum, juvenibus ac senibus utile, prægnantibus etiam non inconveniens tempestivè & dogmaticè præscriptum: si verò impuri succi congeries extrâ venas stabuletur, putâ in cavis hepatis, in pancreate, in mesenterio (quod Medicorum nutriculam vocant) panacea singularis. Hoc laxato salubri alveo latentes evolvuntur humores, evoluti præparantur, tenuiores crassescunt, crassiores attenuantur, attemperati liberius fluunt, coquuntur facilius, moventur utiliùs, excernuntur citius, & ad debitam fibrarum oscillationem magis ac magis accommodantur: quòd si desectitur ab hac methodo vel repugnantia ægrotantis, vel medentis ignaviâ, peccatur gravitèr: huic turpis est mollitudo, illi damnosa cunctatio: si quid autem est peccati, emendat imperata, amandat iterata sectio. Naturæ obtemperare unum est Medici munus, una salus ægrotantis.

V.

QUI salutare naturæ motum intercipiunt, materiamque morbi effectricem exitum per inferiora quarentem non detrudunt, recludunt in alveum, & noxiam noxiè retinent. Quemadmodum insignis hæmorrhagia, abundans hæmorrhoidum fluxus, copiosum menstruorum effluvium, uberior in magnis vulneribus cruoris ex parte læsæ scaturientis jactura gravissimos sæpè morbos discutunt, & ab eorum insultibus vindicant; sic in affectibus subter diaphragma saphenæ sectio liberalis, palmarium est auxilium; apertas tenet vias, impervias aperit, ducit quò natura vergit; cursum sanguinis ita moderatur, ut rapidiori frœnum injiciat, tardiori stimulum addat, nimiam compescat fermentationem, imminutam acceleret, naturalem ab arteriis in

venas commeatum restituat. Solidorum pariter tritum, tubulorumque elaterem sic regit, ut erigat, deprimat, donec in æquilibrio contineat. Sanguine igitur misso ex eâ parte quæ vicinior est laboranti, humores morbum committentes, propter imminutam vasorum plenitudinem, & auctam fibrarum elasticitatem, per propiores magisque convenientes ductus exitum sibi parant; tritum sequuntur viam, per quam magna pars colluviei ad intestina ubertim per venas illabentis adimitur, cujus exclusio eò futura liberalior, quò major extiterit partis afflictæ laxitas, libertas meatuum amplior, fortior naturæ contentio. Hac arte non solum de causâ morbificâ multum detrabitur, febrile compescitur incendium, magnorum vasorum plenitudini prospicitur, inordinatus concitati humoris orgasmus sedatur; sed etiam dolorum acerbitas, inflammationum vehementia, imminentis hydropis labes, podagra, meri potûs aut desidis luxûs fœtura, hæmorrhoidalis vel dysenterici profluvii cruciatus, infarctus ventris contumaciores, totiusque abdominis turbæ non mediocres dissipantur. Hæc praxis non unius est sæculi, sed longioris ætatis, rectæ rationis, oculatæ experientiæ, quotidiani usûs assecla. Novæ quorundam Medicorum hypotheses veterem Medicinam confirmant, non mutant. Itaque accinge gladio manum tuam, ô hæmophobe! Scalpellum acue, & saphenam tunde audacior; hoc ense districto hostiles copias venientes occupabis, præsentis fugabis, intrò furentes series, intercipies, jugulabis. Sed (inquies) sanguis est vitæ thesaurus; quid ita, expende thesaurum, & vitam redime.

Ergo in morbis infra diaphragma præstat saphenæ sectio.

Domini Doctores disputaturi.

*M. Ludovicus Lemery, à Regiâ
Scientiarum Academiâ.*

M. Petrus le Tonnelier,

M. Carolus Thuillier,

M. Carolus Bompert,

M. Bertinus-Simon Dieuxvoisy,

*M. Joannes Boudin, antiquus
Facultatis Decanus, Regi à
sanctioribus Consiliis, Medi-
cus Regis perpetuo ordinarius,
nec-non Serenissimorum Del-
phini & Delphina, dum vi-
verent, Primarius.*

M. Joannes Gaillard,

*M. Nicolaus Andry, Consilia-
rius & Lector Regius, Schola-
rum Professor, nec-non Regius
Librorum Censor,*

M. Guido-Erasmus Emmerez.

Proponerebat Parisiis PETRUS AFFORTY Parisinus, Baccal. Medicus.
A. R. S. H. 1714.

Ex Typographia JACOBI QUILLAU, Typ. Jur. Lib. Universitatis, in via
vulgò dicta Galande.